

Prome kerki di Aruba di aña 1846 mester un renobacion

Aruba danki pa contribui na telethon di kerki protestant



ORANJESTAD (AAN): Den fin di siman tabata tin un tremendo radio telethon cu a tuma luga riba plaza Daniel Leo. Un team di dama y homber balente a dicidi di cera cabes y hunto haci un evento pa asina rescata Kerki protestant cu ta existi for di aña 1846. Esaki sigur ta un edificio historico pa Aruba unda cu ta e prome kerki cu tabata existi na Aruba. E edificio ta un edificio monumental cu mester wordo conserva pa diferente motibo y tambe sigur pa su historia cu e tin su tras.

Actualmente e kerki protestant ta bayendo atras y mester pone bek riba pia. E dak, pilar, y diferente parti di e muraya ta no ta den bon condicion mas. Tambe sigur

un bon pleister ta na su luga. Pesey mes a dicidi di organisa diferente evento pa por recauda fondo pa por drecha e kerki protestant. Den fin di siman a organisa un telethon unda cu tabata tin varios yamada cu mayoria persona a contribui. Tambe tabata tin diferente cuminda, bolo y bebida cu a wordo bendi pa asina tambe contribui pa por logra cuminsa cu e construccion di e kerki mas pronto cu ta posibel.

E Kerki tabata conoci hopi antes como Kerki di Paardenbaai. Den pasado el a ser uza pa Servicionan Religioso, Casamento y pa Obranen Teatral. E ta representa historia di e Protestantnan pero tambe e ta representa un parti di

nos historia Cultural y di Arkitektura. E idea ta pa renoba e edificio den su estado original manera e tabata.

E restauracion ta bay ta 3 biaha mas caro cu construccion normal. E fondo recauda lo wordo uza pa restaura e edificio den su estado original y hendenan di tur Fe lo por uze despues pa resa of medita. Tur esunnan cu haci un donacion lo tin un luga special den e buki documentario di e Kerki cu lo ser publica despues na momento di su reapertura. Comision di kerki ta gradici na tur esunnan cu a aporta di un manera of otro pa por logra yega na e suma di 700 mil florin pa renobacion di e kerki.